

Kulturikkut ingerlatsineq sunngiffimmilu sammisassaqaqtitsineq pillugit Inatsisartut inatsisaata allangortinneqarnissaa siunertaralugu Naalakkersuisut peqquneqarnissaannik Inatsisartut aalajangiiffigisassaattut siunnersuut. Inatsimmi piumasaqaataasut appartinnerisigut kommunini inoqarfiit ukiut tamarmik kulturikkut ingerlatsineq sunngiffimmilu sammisassaqaqtitsineq pilersaarusiortalissavaat.
Inatsisartunut ilaasortamit Mimi Karlsenimit, Inuit Ataqatigiit, saqqummiunneqartoq

pillugu

siunnersuutip aappassaaneerpeqarneranut

**Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliap**

ISUMALIUTISSIISSUTAA

Ataatsimiititaliap suliarinninnermini inuttarai:

Inatsisartunut ilaasortaq Nivi Heilmann Efraimsen, Inuit Ataqatigiit, siulittaasoq
Inatsisartunut ilaasortaq Isak Johannessen, Naleraq, siulittaasup tullia
Inatsisartunut ilaasortaq Margrethe Thårup Andersen, Demokratiit
Inatsisartunut ilaasortaq Karen-Marie Kyed Frederiksen, Demokratiit
Inatsisartunut ilaasortaq Nivi Rosing, Inuit Ataqatigiit

UPA2026-mi 27. maj 2026-mi siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Kulturikkut ingerlatsineq sunngiffimmilu sammisassaqaqtitsineq pillugit Inatsisartut inatsisaat allangorteqqullugu Naalakkersuisut peqquneqarnissaat siunnersuutikkut siunertarineqarpoq, taamaaliornikkut sunngiffimmi atuartsinermi ataqatigiinnik pilersitsinissamut piumasaqaatit appartinneqarsinnaaqullugit aammalu kommunit kommunimi inoqarfinni tamani kulturikkut ingerlatsinermut sunngiffimmilu sammisassaqaqtitsinermut ukiut tamaasa pilersaarusiortaqullugit.

Siunnersuutip Inatsisartunit siullermeerpeqarnera

Siunnersuut suliarineqarmat tapersorsorluarneqarpoq. Kulturikkut sunngiffimmilu sammisassat ineriartorteqqinneqarnissaat ataatsimut isigalugu soqutigineqarpoq, aammalu unnukkut

atuartitsinermik, tassungalu ilanngullugu motorinik iluarsaassinermik, qilattaanermik il.il. neqerooruteqarnissap pingaaruteqarnera oqaluuserineqarluni.

Peqataasussat ikinnerpaaffeqarnissaannik piumasaaqatip attatiinnarneqarnissaa naapertuunnersoq apeqquserneqarpoq. Kiisalu atuartitsisut aningaasarsiaqartinneqarnissaannut periarfissaqarnersoq paasinarsisinneqassasoq kissaatigineqarluni.

Sammissassanik pilersitsinissap pisariinnerulersinneqarnissaanik siunnersuutip siunertarisaa naammagisimaarneqartoq oqaatigineqarpoq. Tamatuma peqatigisaanik erseqqissaatigineqarpoq unnukkut atuartitsinermut atatillugu assassorneq tassaasoq amerlanerusunik neqerooruteqartoqarnissaanik pisariaqartitsiviusoq.

Immikkoortup siullermeerneqarneranut atatillugu Naalakkersuisut allannguutissatut siunnersuut imaattoq saqqummiuppaat:

”Kulturikkut ingerlatsineq sunngiffimmilu sammissassaqaartitsineq pillugit inatsisartut Inatsisaat aallaavigalugu sunngiffimmi neqeroorutit pillugit kommuunit oqaloqatigineqarnissaannut Naalakkersuisut peqquneqassasut siunertaralugu sunngiffimmi neqeroorutit siuarsarneqarlutillu nutarterneqarnissaat, aammalu kommunini inoqarfiit ukiut tamaasa kulturikkut ingerlatsineq sunngiffimmilu sammissassaqaartitsineq pillugu pilersaarusiortarnermut kommunit peqatigalugit anguniakkat, sinaakkutit imarisaallu aalajangersarneqarnissaannut Inatsisartut aalajangiiffigisassaattut siunnersuut”.

Immikkoortoq ataatsimiititaliamit suliarineqartussanngorlugu Demokratinit innersuussutigineqarpoq. Naleqqap Naalakkersuisut allannguutissatut siunnersuutaat taperserpaa immikkoortorlu ataatsimiititaliamit suliarineqartussanngorlugu innersuullugu. Inuit Ataqatigiit siunnersuut taperserpaat ataatsimiititaliamullu suliarineqartussanngorlugu innersuullugu. Siumup Atassutillu Naalakkersuisut allannguutissatut siunnersuutaat taperserpaat.

Siunnersuutip aningaasaqarnikkut kingunerisassai

Aalajangiiffigisassatut siunnersuutit piviusunngortinneqarneranni aningaasaqarnikkut allaffis-sornikkullu kingunerisassat siunnersuutip tungavilersuutitaani nassuiaatigineqartassasut Inatsisartut suleriaasianni § 33, imm. 1-imi allassimavoq.

Siunnersuut piviusunngortinneqarpat aningaasaqarnikkut kingunerisassat nalunaarneqarsimasut ataatsimiititaliamit maluginiarneqarpoq, taamaalilluni taakku ukioq naallugu AC-fuldmægtigitut atorfimmum affarmut naapertuunnissaat naatsorsuutigineqarluni, tassa imaappoq 250.000 kr.-inut.

Ataatsimiititaliap siunnersuummut oqaaseqaatai

Kulturikkut ingerlatsineq sunngiffimmilu sammisassaqaartitsineq pillugu Inatsisartut inatsisaat allanngortinneqassappat suliassaqaarfimmi unammilligassaviit aallaavigineqarnissaasa qulakkeerneqarnissaa siunertaralugu kommunit oqaloqatigineqarnissaat pisariaqartinneqartoq Naalakkersuisunit paasissutissiissutigineqartoq ataatsimiititaliamit maluginiarneqarpoq. Inatsimmi unammilligassat kommunit oqaloqatigalugit suussusersineqarnissaannik Naalakkersuisut kissaateqarnerat pitsaasuusooq ataatsimiititaliamit oqaatigineqassaaq, minnerunngitsumik immikkoortoq matumani pineqartoq pillugu Naalakkersuisut saaffiginnissutaannut kommunit amerlanerit qisuariaateqarsimannginnerat pissutigalugu.

Kiisalu kulturikkut ingerlatsinermut sunngiffimmilu sammisassaqaartitsinermut atatillugu atuartitsisussarsiortarneq, aningaasaqarnikkut atugassarititaasut najukkanilu pissutsit eqqarsaatigalugit kommunit unammilligassaqaartut ataatsimiititaliamit oqaatigineqassaaq. Tamatuma peqatigisaanik peqataasussat ikinnerpaaffissaannik piumasaqaat assigiimmik sakkukillisinneqarnissaannut taarsiullugu najukkani assigiinngiaartoqarnera eqqumaffiginarlugu tunngavissat eqaannerusut assigiinngisitaarnerusullu kissaatigineqarput. Kommunit Naalakkersuisullu akornanni oqaloqatigiinnissani unammilligassat aaqiissuteqarfiginiarlugit kommunit qanoq pilersaaruteqarnerusut iliuusissallu suut aallartinneqareernersut ilanngullugit oqaluserineqarnissaat naleqquttuusooq ataatsimiititaliaq naliliivoq. Tamatuma peqatigisaanik kommunimi kulturikkut ingerlatsinermut sunngiffimmilu sammisassaqaartitsinermut pilersaarummik kommunalbestyrelsi ukiut tamaasa suliaqartassasooq ataatsimiititaliamit maluginiarneqarpoq. Inatsisartut inatsisaata allannguutigisinnaasaanik isumaliutiginninnermi oqaloqatigiinnermilu tamanna ilanngunneqartariaqarpoq, tassa kommunit arlallit nittartakkaminni pilersaarummik ilanngussaqaarsimanngimmata.

Nunatsinni teknologiikkut ineriartornerup, tassungalu ilanngullugu internetsip sullississutinillu digitaliusunik atuineruleriartornerup innuttaasut kulturikkut sunngiffimmilu ileqqorisaat allanngortissimagai ataatsimiititaliaq isumaqarpoq. Inatsisartut inatsisaata allannguutigisinnaasaanik isumaliutiginninnermi oqaloqatigiinnermilu tamanna aamma ilanngunneqartariaqarpoq.

Tamatuma peqatigisaanik kommunalbestyrelsit, tassungalu ilanngullugu nunaqarfinni illoqarfinnilu ataasiakkaani allaffeqarfiit kulturikkut ingerlatanik sunngiffimmilu sammisassaqaartitsinermik pilersaarusiornissamut ineriartortitsinissamullu suliatigut aqutsinikkullu pisariaqartinneqartunik piginnaasaqarnissaat ataatsimiititaliamit pingaartinneqarpoq. Tamanna Naalakkersuisut kommunillu akornanni oqaloqatigiinnermi aamma ilaatinneqartariaqarpoq.

Innuttaasut kulturikkut sunngiffimmilu ingerlataasa nukittorsarneqarnissaat siunertaralugu

kommunit ilisimasanik misilittakkanillu akunnerminni avitseqatigiinnissamut periarfissaqarmata ataatsimiititaliamit erseqqissaatigineqassaaq.

Tamatuma peqatigisaanik kommunini kulturikkut sunngiffimmilu suliassaqarfimmi unammilligassaasinnaasut inatsisinut tunngasunik, kommunip suliniuteqannginneranik allanilluunniit pissuteqarnersut oqaloqatigiinnermut ilanngullugu sukumiisumik nalilersorneqarnissaa pingaaruteqartoq ataatsimiititaliaq naliliivoq.

Kulturikkut sunngiffimmilu neqeroorutit ikorfartorneqaannarnissaat ineriartortinneqartuarnissaallu innuttaasut pitsaasumik inuuneqarnissaannut eqqarsartaatsikkullu peqqissuunissaannut pingaaruteqartut ataatsimiititaliaq isumaqarpoq.

Ataatsimiititaliap inassuteqaatai

- Ataatsimiititaliami amerlanerussutillit, Demokraatineersut aamma Inuit Ataqtigiiinneersut, allannguutissatut siunnersuut tulliuuttoq akuerisassanngorlugu inassuteqaatigaat:

”Kulturikkut ingerlatsineq sunngiffimilu sammisassaqtitsineq pillugit inatsisartut Inatsisaat aallaavigalugu sunngiffimmi neqeroorutit pillugit kommuunit oqaloqatigineqarnissaannut Naalakkersuisut peqquneqassasut siunertaralugu sunngiffimmi neqeroorutit siuarsarneqarlutillu nutarterneqarnissaat, aammalu kommunini inoqarfiit ukiut tamaasa kulturikkut ingerlatsineq sunngiffimilu sammisassaqtitsineq pillugu pilersaarusiortarnermut kommuunit peqatigalugit anguniakkat, sinaakkutit imarisaallu aalajangersarneqarnissaannut Inatsisartut aalajangiiffigisassaattut siunnersuut. Inernerit nalunaarusiannngorlugit kingusinnerpaamik UKA 2027-mi Naalakkersuisunit Inatsisartunut saqqummiunneqassapput”.

Tamatuma peqatigisaanik ataatsimiititaliap siunnersuummut oqaaseqaataasa kommuunit oqaloqatigineqarneranni ilanngunneqarnissaat Naalakkersuisunit ataatsimiititaliami amerlanerussuteqartunit Demokraatinit aamma Inuit Ataqtigiiinneersunit kaammattuutigineqarpoq.

Ataatsimiititaliap taama oqaaseqaateqarluni isumaliutissiissummilu allassimasutut paasinnilluni siunnersuut aappassaaniigassanngortippaa.

Nivi Heilmann Efraimsen
Siulittaasoq

Isak Johannessen
Siulittaasup tullia

Margrethe Thårup Andersen

Karen-Marie Kyed
Frederiksen

Nivi Rosing